

Þjófum að þakka að Kalli á Spáni varð til



Þórdís Lilja Gunnarsdóttir
thordisg
@frettabladid.is

Karl Kristján Hafsteinn Guðmundsson er „Íslenskum Spánverjum“ að góðu kunnur sem Kalli á Spáni.

„Eftir tíu daga vetrarleyfi á Spáni árið 2018 sagði ég í framhaldinu upp vinnunni og við hjónin máttum okkur við Spán veturinn á eftir. Þá var ég sextugur og hafði unnið á kvöld-, nætur- og helgarvöktum sem öryggisvörður hjá Reykjavíkurborg á Vitatorgi í tæp níu ár,“ segir Karl Kristján Hafsteinn Guðmundsson, sem margir þekkja sem Kalla á Spáni. Kalli er 64 ára prentsmíðameistari, Hafnirðingur úr Hvaleyrarholtinu, fjögurra barna faðir og afi sjö barnabarna.

Þau hjónin hafa æ síðan búið í Torre Vieja á Spáni og una hag sínum vel.

„Við komum þó til Íslands á hverju sumri og erum þá í nokkrar vikur á 30 ára gamla húsbílum okkar, nema hvað við komumst ekki eitt sumarið í Covid-firrunni. Það er gott að búa á Spáni á íslenskum lágmarkstekjum lífeyris vegna verðlagsins og veðrið hér er á við gott íslenskt sumarveður. Það fer betur í liðina en íslensk, rysjótt veðráttan. Sjálfur fer ég ekki á baðstrendur, ég spila ekki golf og stunda ekki sólböð, en það er hlýjan og verðlagið sem freistaði okkar,“ greinir Kalli frá.

Google bauð heim til Los Angeles
Kalli heldur úti vinsælli vefsíðu fyrir Íslendinga sem búa í Torre Vieja og á Spáni: kalli.is. Hann segir frá því hvernig það kom til.

„Undir lok fyrsta vetrarins okkar á Spáni keyptum við bíl til að geta farið víðar en fótgangandi um næsta nágrenni. Íslendingar voru duglegir að hittast í Múlakaffi, á Sundlaugarbarnum, Klaustursbarnum og víðar. Einnig voru hér vinsælir götumarkaðir, svo sem Laugardagsmarkaðurinn og Sítrónumarkaðurinn og svo hittust Íslendingar líka til að spila félagsvist og bridge. Hinir nýkomnu, eins og við, rötuðu ekki á þessa hittinga og því var nokkur barningur að finna þá,“ segir Kalli sem tók það til bragðs að útbúa viðburðadagatal þar sem íslensku staðarnöfnin voru notuð ásamt þeim spænsku, sem og staðsetningar á kortum frá Google Maps.

„En staðsetningarnar hjá Google Maps voru yfirleitt rangar. Því fór ég á stúfana, fann þessa staði og leiðrétti vitleysuna hjá þeim. Það gekk meira að segja svo langt að Google bauð mér til höfuðstöðva sinna í Los Angeles, en ég nenni ekki að fara í slíka ferð,“ segir Kalli og hlær.

Afdrifaríkt innbrot

Það var svo einn morguninn að brotist var inn í sólstofu Kalla og konu hans, Sigurveigar Sigurðardóttur.

„Þar hvarf meðal annars spjaldtölvun, en það er þjófunum að þakka að vefsíðan Kalli á Spáni, eða kalli.is, varð til. Ég átti fartölvu sem ég hafði ekkert notað og tók hana til brúks. Ég átti líka lénið kalli.is en hafði aldrei gert neitt við það. Þremur dögum síðar var svo vefsíðan kalli.is komin í loftið, vefur sem birtir ýmislegt sem gagnast Íslendingum á Spáni. Þar eru upplýsingar um hvað eina sem snýr að þeim sem vilja flytja til Spánar, til dæmis ýmis eyðublöð og meira að segja skattareiknivél sem ég útbjóg og viðheld,“ upplýsir Kalli.

Hann segir „Íslensku Spánverjana“ ánægða með vefinn.

„Þeim þykir gott að geta séð allt sem skiptir þá máli á einum stað. Viðburðadagatalið tók um leið stakkaskiptum og er nú hluti af



Kalli á Spáni á jólahittingnum á Sundlaugarbarnum um nýliðna helgi. Dýrindis máltíðin með hálfri flösku af víni kostaði 22 evrur eða um það bil 3.300 íslenskar krónur. MYND/ÆSEND



vefnum. Þar getur fólk sett inn sína viðburði sjálf, eða fengið aðstoð við það, og sömuleiðis auglýst frítt. Áskriftin er ein evra á mánuði, sem er hugsuð til að greiða kostnaðinn af vefnum á móti mér. Það fyrirkomulag hefur reynst vel og mælist kalli.is með einkunnina A.“

Heim til Íslands til að hvíla sig

Tilveran í Torre Vieja er rík af félagslífi og góðum stundum.

„Íslendingar á íslenskum ellilífeyri láta vel af sér á Spáni. Margir eru á leið heim um jólin, aðallega til að hvíla sig. Það er svo mikið um að vera hérna á Spáni. Við hjónin erum reyndar afskaplega heima-kær, við förum sjaldan á hittinga, bari eða út að borða. Það má eiginlega segja að við séum efnahagslegir flóttamenn frá Íslandi,“ segir Kalli.

Hann segir Íslendinga duglega að halda hópinn og eignast nýja vini í samfélagi sínu í Torre Vieja.

„Fólk er afar upptekið og þau sem héldu að það yrði ekkert um að vera eftir starfslok hafa aldrei haft meira að gera. Þau sem fóru aldrei út að borða heima á Íslandi, nema kannski á árshátíðir, fara nú nokkrum sinnum í viku. Þá er Íslendingafélagið á Spáni það virkasta í heimi, þegar lítið er til annarra Íslendingafélaga, og Félag húseigenda á Spáni er yfir þrjátíu ára gamalt, opið öllum og með þjónustu- og öryggisfulltrúa hér á svæðinu,“ upplýsir Kalli.

Fyrir ári síðan hafi íslenskur söfnuður verið stofnaður á Spáni, er nefnist Luther (sjá luther.is).

„Nú hefur íslenski söfnuðurinn fengið inni í glænýrri, sænskri kirkju með barnastarfið sitt og næsta sunnudag verður þar adventu- og jólaguðsþjónusta þar sem presturinn okkar, séra Ragnheiður Karítas Pétursdóttir, og séra Gísli Gunnarsson, vígslubiskup á Hólum í Hjaltadal, þjónusta

Séð yfir hluta Torre Vieja úr lofti. Glæsilegar byggingar, sundlaugar og snyrtilegur bær þar sem fer vel um fjölmarga Íslendinga sem þar njóta lífsins árið um kring. MYND/PEXELS

söfnuðinn. Þar verða sungin íslensk jólalög og í stuttu máli er allt að gerast á Spáni,“ segir Kalli.

Fjölgar sífellt í hópi Íslendinga
Þegar Kalli og Sigurveig fluttu til Spánar töluðu þau ekki stakt orð í spænsku.

„Við förum á spænskunám-skeið í nokkur skipti en þegar við ætluðum að æfa okkur í notkun tungumálsins í búðum og á veitingastöðum var okkur alltaf svarað á ensku. Aftur á móti vilja opinberir aðilar nær eingöngu tala spænsku og því verður maður að hafa túlk með sér, sérstaklega þar sem tímappantanir eru umsetnar. Ég hef meira að segja lent í því að næsta manneskja á undan í röðinni var afgreidd á ensku en svo þegar kom að mér var bara töluð spænska og örloði ekki á neinum enskuskiptingum. Margir hafa líka upplifað að vera afgreiddir á ensku en svo hafi verið svissað yfir í spænsku ef erindið varð óþægi-legt,“ upplýsir Kalli.

Hann segir sífellt fleiri Íslendinga flytja utan til Spánar.

„Já, samfélag Íslendinga á Spáni fer ört stækkandi því dýrtíðin á Íslandi er allt að drepa. Það er vonandi að Seðlabankinn haldi fast í gengi íslensku krónunnar gagnvart evrunni svo Ísland fái ekki allt þetta fólk í hausinn. Það er ljóst að heilbrigðis- og félagsmálakerfin heima þyldu ekki álagið sem fylgdi slíkum hreppaflutningum Íslendinga frá Evrópu.“

Í venjulegu árferði var verðlag á Spáni um 55 prósent af því sem Íslendingar eiga að venjast á Íslandi.

„Þessi munur, er að mér finnst, ivið meiri þótt vöruverð hafi hækkad á báðum stöðum. Þar munar mestu um stýrivaxta-breytingar Seðlabanka Íslands. Mér finnst sorglegt þegar ungt fólk er platað í ágætis lánakjör með 0,5 prósentu stýrivöxtum og þeir síðan hækkad í 6 prósent á stuttum tíma. Þetta þýðir hreinlega að fólk sem á sér lítið bakland missir allt sitt innan árs til þeirra sem standa þessa hækkun af sér,“ segir Kalli.

Veðrið og verðið heillar mest

Það liður senn að jólum og tindrandi jólaljós farin að skína skært í Torre Vieja.

„Íslendingarnir eru margir farnir að setja upp jólaljós, Félag húseigenda á Spáni var með fyrsta opinbera jólasamsæti Íslendinga á föstudaginn var og adventukaffi á sunnudögum er víða byrjað. Matkráin Bar-Inn, sem er í eigu ungrar íslenskrar konu, er til dæmis talin vera mest skreytti barinn á svæðinu og þar verða „litlu jólin“ haldin í desember og hátíðarmatur öll jólin,“ segir Kalli.

Hann segir Íslendinga vel liðna af heimamönnum í Torre Vieja.

„Spánverjar eru almennt hrifnir af Íslandi, margir hafa lagt leið sína þangað og hjá enn fleirum er Íslandsferð á óskalistanum. Íslendingar sem eru hér á Spáni njóta þessarar velvildar.“

Spurður hvað honum líki best við lífið og tilveruna í Torre Vieja, svarar Kalli:

„Í stuttu máli veðrið og verðið. Tiðarandinn er líka afslappaðri. Spánverjar eru ekki að flyta sér eins mikið og Íslendingar, svo hér er minna stress.“

En fær hann stundum heimþrá?

„Nei, eiginlega ekki. Samskipti við ættingja og vini eru mestmegnis á netinu og í síma. Maður er ekkert ómissandi,“ segir hann og hlær. ■

Sjá kalli.is

Spánverjar eru almennt hrifnir af Íslandi og margir hafa lagt leið sína þangað. Íslendingar sem eru hér á Spáni njóta þeirrar góðvildar.

Kalli á Spáni